

potuit, (nam illis primis 300. annis Ecclesia planè floruit) quis dubitat, hoc tempore eam, neglecto, imò etiam repudiato isto Antichristo, florere posse? Quis item dubitat, istam Pontificiam tyrannidem à Christo institutam non esse? Si enim Christi mandato ac ordinatione ista Papalis authoritas instituta fuisset, profectò primitiva illa Ecclesia, in tanto flore pietatis ac eruditionis, eam non ignorasset, multò minus neglexisset. Nec tamen tantum Pius iste secundus hoc testatur, sed & omnes vetustissimi Scriptores idem satis indicant. Cyprianus certè, qui & ipse Episcopus fuit, quoties ad Romanos Episcopos, aut alioqui de eis scribit, ita loquitur, ut in nullo eos suos Dominos aut Superiores agnoscere videatur: Appellat eos suos *Consacerdotes, Cœpiscopos, Fratres & Collegas*. Hinc igitur, & multò magis ex ipsa Historia, poterit Amplitudo vestra, Eximii ac Prudentissimi Domini, cognoscere, quàm plane nullo divino jure Papa Romanus cæteris Christianis imperet. Nam taceo jam plurimas ejus planè horribiles idolomanias. Quæ cum ita se habeant, meritò etiam impientissimum istum Tyrannum de vestris ac subditorum vestrorum cervicibus excutietis, ejus abominationes abolebitis, veramque ac sinceram Christi pietatem, ex ipsius sacrosanctis Evangeliorum fontibus haustam, instaurabitis. Multa autem sunt, quæ Vos ad hoc hortantur, præter illud severissimum Dei mandatum, quod idololatriam fugere jubet: item detestari ac anathematizare omne aliud Evangelium, præter id, quod Christus ac Paulus docuit, severiter præcipit. Cogitate, quæso tantum injurias, quas vel olim ab isto Tyranno perpessi estis; vel ne deinceps patiamini, si sub ejus tyrannide permanseritis, valde profectò verendum est. Nolo jam prolixè commemorare istorum impurissimorum ac impientissimorum Tyrannorum injurias, erga vestram præclarissimam Rempublicam, cum sæpè temerè, sine ulla justa causa, vel bella tristissima aut ipsi contra Vos moverunt, aut ut alii moverent, incitarunt, frigidamque suffuderunt, vel etiam Vos, unà cum omnibus vestris fidis subditis, excommunicaverunt, ne videat malorum vestrorum commemoratione delectari. Liceat mihi, quæso, jam solum illud teterrimum immanissimumque istius